

四庫全書

集部

欽定四庫全書

集部

桂隱文集卷四
附錄

詳校官中書臣閔思毅

侍讀臣孫球覆勘

總校官進士臣朱鈴

校對官編修臣盧遂

謄錄監生臣施華

欽定四庫全書

桂隱文集卷四

元 劉詵 撰

雜著

說

劉紹平號平晤

扁鵲得長桑君要劑故能洞見人腠理腸胃孫思邈得龍角三十方故能名千載療百世蓋醫之神者其初必有鬼物為之授受要非臆度意揣所能到也安成良醫

劉此山其先嘗遇異人俾以丹繼俾以善訣由是醫益
神此山身長魁梧端視徐行治病尤奇驗大家爭迎至
恐後而此山怡然未嘗有矜色汲汲治貧者病活之此
山字紹平自號平晤夫天下之窮林喬木多矣下至一
州一邑必有名區勝境可為美稱者故孫復號稱大山
石守道號稱徂徠真希元自號西山楊伯子自號東山
近世前輩亦有號南山號崑崙者大抵非張大之過則
期望之高今紹平乃取平晤以自號按山有峘晤者山

之隱而不耀者也夫其隱而不耀者則何如其平也夫
抱已顯之技而託之於甚隱挾可高之名而處之以甚
平紹平之用心可見矣今夫山在天地間隆隆奔赴斗
起千丈出雲霞而隔天日者非不高矣然數節之後其
勢一落無復能環之如兒孫者維茲勢之平者則常綿
綿延延亘千里而不止紹平之用心其將使百世為此
平歟吾聞古之仙人無不妙於方藥然往往皆隱君子
為之今是家父子神於技隱於德吾疑其人之所以授

其先者不獨方藥也劉氏之福其未艾乎

劉漢隱字

盧陵劉賓遠字漢隱有才學連年館城中還往吾門以漢隱之義謁余言余謂三代以前如耕莘築巖釣渭之夫皆深隱而不出及其一旦而出則使世道為堯舜不可尚矣下至虞仲夷逸朱張少連之徒荷蕷耦而耕之士皆經聖人評論不可復有褒貶今君之於隱但以漢言然西漢隱士無傳商山四皓其傑然者歟東漢逸民傳

者十八其立身尚志亦皆有可觀然能使東漢二百年
高人義士清風峻節耿耿相望則皆嚴子陵有以倡之
其末也又有躬耕南陽抱膝長嘯雖在十八傳之外然
方之伊傅尚父固無愧也然則西漢之隱固有愧於東
漢多矣今君於兩漢之隱宜何從乎蓋高之為孔明子
陵次之為四皓至若樊英輩之純盜虛聲者固無足取
也君尚勉之

贊

見翁真容

其幼而無怙也委孤楫於波濤之流其長而自立也屹
桀棟於風雨之秋其應世以才如綸巾羽扇之孔明其
處鄉以善如欵段下澤之少游聲吐洪鐘儀像山立笑
諧足以霑四坐之磊砢忠厚足以化平昔之怨尤能容
物似千頃之陂不傲物似百尺之樓蓋其不可及者積
學之子孫如謝氏之江左而種德之家世如富公之青
州也

頌

三節六桂堂

北庭偰氏世出高昌皇元龍興以義來內附至莊簡益顯莊簡子都運早備宿衛克有勲勞遷為廣東鹽運使子正議大夫吉安監郡始畱豫章居焉於所居建三節六桂堂而家愈大初都運在廣東朝廷方征南交護督漕餉會海盜大集轉鬪失利以罵賊死事聞上嘉其節謚忠愍贈守忠全節功臣時夫人方盛年確守貞節母

子相依倚為生正議甫數歲母嘗病劇刲股和藥露禱獲安天下謂之三節正議五子世玉世學世德世南世則其猶子世文宿嗜學如飢渴科舉興遂連登上第布列中外天下謂之六桂議者又曰非三節不足以兆六桂非六桂不足以顯三節合為一堂實宜古之君子為善而得報於天者有矣然往往多曰種德于公欲高大其門自謂活人竇氏五桂並芳世謂其好施王氏種三槐以待三公亦恃其保符彥卿夫活人與好施皆為善

然安知不出於有意以揣摩之心而要於天天雖不爽其福而君子猶薄之若偰氏之獲福則純乎天理而已蓋不肯辱其君不忍忘其夫其心豈有望報於天者其剗股救母此心但以答母為福豈計及其子孫哉故天理與種德異天理發於公而無所窺擬種德雖發於公而種之必望其報以是觀之偰氏之福德過人遠矣況惟古之有盛德必有頌魯僖公修泮水人猶頌之況偰氏之盛德舍頌不足以為美乃作頌曰猗歟偰氏著述

於唐武功文德有烈其光都運桓桓佐我烈祖殺身成仁
遂一海宇曰維忠愍大馘蠻猺樓船斧鉞曰靖海潮嗟
彼狂獮將踣愈噬邂逅授命垂耀百世帝若曰嘻維汝
盡忠錫汝美謚以崇厥功鐵驍金戈助擊羣醜邦人異
之廟祀以久高堂渥丹自誓栢舟所見者義貞烈誰儔
正議在髫恩著厥孝剗股療母至性誰教三節之大萃
於一堂上契天道下正人綱春官取士六擢其桂青雲
聯鑑銀漢竝袂懿哉正議監郡蘆陵耆稚載道言觀其

旂黃堂深廣庭有嘉木公坐於堂白日肅肅民曰我公
郡之黃龕士曰匪伊為時歟龍朝有良臣家有才子名
在天下功在國史

跋

題危大樸與鄧子明書後

右宣文閣經筵檢討危素大樸所與鄧晉子明二書子
明宋禮部郎官兼學士院權直申齋鄧先生孫也禮部
登景定壬戌第與大樸曾祖炎震子仁同年宋且亡禮

部隨駕入海親見厓山戰敗陸秀夫抱幼君沉海遂亦蹈海者再為北軍所鈎致不死知當時興亡事極詳後文丞相囚金陵禮部實與俱日夜相與唱和詩歌以娛悲紓痛張宏範元帥以客禮謁請為其子師及歸廬陵以所聞見集錄為野史若干卷藏不示人今七十餘年遇聖朝修遼金宋三史詔求天下故史遺文大樸實銜朝命來江西至廬陵求禮部所為書予明雖誼不敢祕值有祖母之喪不即送上大樸先後有此二書嗚呼自

古亡國多矣未有百戰海島鑿舟自沉其間忠臣義士
貞夫節婦死者何限天下不能盡知禮部此書誠不可
少壬戌科取士六百三十五人多名士廬陵則禮部與
須溪劉先生在焉禮部與子仁雖同榜未知其相厚與
否今子孫異代數十年之後交游方深大樸揚聲中朝
為時名雋子明不隨世學抱其先祖所著上進史館以
成前代之書世遠家存人亡言在皆非偶然有可感者
有可敬者余以耄老伏處山林尚及見之且先叔祖鎔

子叔父士器與危鄧二氏皆有壬戌年家之好因書以識感慨云

題浦陽鄭氏義門家範後

余少時觀司馬公家範顏氏家訓朱子家禮及夫桐木之韓花樹之韋所著家法知中州先輩軌範未嘗不同但世道趨於下此意遂希濶鮮有聞有識者每為之一嘅今觀浦城鄭氏家規則知舊人典刑尚未泯也然合族而居原於家之有法家法之正原於詩書之漸摩見

聞之講貫以詩書為家宜其齊且穆也鄭氏九世一堂同食此固難矣世豈有家法如此之正而町畦異爨者哉唐張公藝雖曰九世同居及高宗問其何以能若是則大書忍字百餘以對嗚呼忍而後能如此亦出於勉強矣其視鄭氏豈不有所愧哉

書蕭煥有臨江為政碑後

余舊閱古人平反輒為反覆數過喜快若親見又恨今世無復見此人及見其斥鬼神破妖異則又疑史氏或

採摭之過今觀蕭君煥有臨江所為政則知古今人真無不相及而史皆信史也夫知屈抑而不敢言見像偶而輒下拜皆休於禍福也天下惟不休於禍福者可以行其志天下惟學而有守者不休於禍福蕭君之政通幽明而無間其要不越於學耳今方閉門益究經史則其政未可量也仕而優則學學而優則仕蕭君有焉

跋林常春家藏紹興關書

古今世祿之家子孫疎傲不知厥先創業之難昧其原

緒者多矣春秋傳稱王叔不能舉其要是也高門大第崇臺列榭一再傳而為墟亦多矣漢史稱此屋閑人如傳舍是也是故庾信羅含之故宅屢易異姓溫公康節之契約流落他人良可嘅也友人林君常春示余其家所藏紹興關書更歷離亂今二百數十年而屋與契俱存不其難哉天之將昌林氏觀此可知矣

書曾成玉所贊前御史哈喇召覲圖及所贊詩

後

今廉訪監司哈喇公稟天地剛正之氣負霜雪凜冽之操其立中朝鹹排權貴多矣近歲為御史又以直言劾奏大臣坐是遠貶南荒所過道路無敢親比之者獨廬陵曾成玉作詩遮見追送不憚遠可謂有義氣矣因念漢黨錮之禍唐楊臨賀宋胡新州諸賢之貶平生親友弃去如穢乃獨有一二耿介不顧死生而慕義因以得名曾成玉宜其人哉今又為詩百詠以見公志跡其前所為必非以此為取憐求媚者故贊以壯其行云

跋四君圖後

古今士大夫人品之高下原於心術之正邪心術之正邪又係於師友淵源之所自戰國之士所師者轉丸肱篋為口吻之驗全身之區其見鄙妾媿固宜若戴崇彭宣輩師安昌侯張禹此豈復磊磊落落之名節也哉子夏之學為田子方再傳為莊周君子謂其激於拘繫之過荀卿之學為李斯又得於其師見趣議論之偏嗟夫學術所關大矣甚可畏也宋承五季極弊之後而士大

夫嘉言善行比隆三代其故何哉以其師道之正非前代比耳若湖學關洛紫陽之徒黨扶樹教化其功何可勝述比季世秘監歐陽公巽齋先生以雄文邃學為世師表一時名士多出其門而信國文公於先生為嫡孫行大傳劉公禮部鄧公則高弟也信國既以名節高百代而大傳禮部亦卒為宋全人以文章重天下宋雖亡國而景光無窮先生力也先生當賈呂勢焰薰灼力陳其奸萬死不顧使遇事變豈肯全軀保妻子要之其教

學者皆本仁義忠孝故其效如此嗚呼其可仰也夫

跋文信公和東坡赤壁詞後

坡公此詞妙絕百代然恨鮮得其所自書者信國文公所和雄詞直氣不相上下而真跡流落如新尤可謂二美具矣昔朱文公少時嘗學曹表劉共父學鹿脯帖文公以其字畫古謹之共父謂予所學者唐之忠臣公所學者篡賊何論古今文公終身以為愧嗚呼此書距今纔四十年其可敬慕何必在千載之上哉

附文信公和詞

乾坤許大、筭蛟龍、元不是池中物、風雨牢愁
無著處、那更寒蛩四壁、橫槊賦詩、登樓作賦
萬事空中雪、江流如此方來、還有雄傑堪歎
一葉飄零重來淮水涼、風初發、鏡裏朱顏都
變盡、只有丹心難滅、去去龍沙向江南、回首
青山如髮故人應念杜鵑枝上殘月

題李氏所藏先世交游翰墨

內姪李同立仁藏其先祖傳園翁祖深齋主簿父伯英
學正三世所交名公翰墨寶之如珙璧自傳園至今且
五十年中更離亂人事升沈伯英立仁皆早孤而能寶
此難矣傳園翁博學多文及交東山楊公大小山二蕭
公東南名士多相與今獨存約山朱公一帖深齋穎悟
絕人未弱冠文章川湧山拔凌厲一時約山諸公皆期
以國器交游必天下士文山須溪心遠尤篤密往還書
問最多嘗與文山心遠共作論如聯句各手書於篇寶

祐丙辰與兄肯堂及文山同赴省中途屢聯句為賦論
既而肯堂省憇文山殿魁皆數歷顯要先生獨至咸淳
甲戌方第既沒族姪鶴田狀其行須溪為銘誌良特甚
今獨文山三書心遠一書鶴田行狀藁存而諸公往還
書翰聯句賦論須溪手書墓銘皆不見伯英少游燕邵
菴松雪善之伯長諸鉅公特相厚翰墨尤多今鄧公詩
亦不復見以是知三世所交游翰墨存者特十百之一
二豈不愈可寶哉余於傳園公為外孫幼嘗徃還外氏

凡前所稱翰墨多親見之今覩此卷固傷其不免於流落而尤以其能寶為喜淵明凱風寒泉之思羊曇西州丘山之痛惓然於懷故書此不敢簡略云

書揭先生所書千字文

余與蕭氏交舊矣元統甲戌乙亥間於孚有家見今翰林學士揭公手書千文正直端楷如刀畫玉心甚重之時坐有善書者張漢英尤手書之不置後三年孚有酷歿其所藏書畫不得復見漢英一日於他人家偶見此

卷曰噫此故人孚有所藏也問其所從來則孚有之豎童盜而鬻之也乃歸其直丐而藏諸家又四年漢英出示此卷求嘗與孚有往來者叙其故余念朋友死生離合物之變遷流落皆有可感者此卷藏於漢英猶幸為不失所也

書虞邵菴送體仁叙後

邵菴虞先生少有仙才靈氣侍袞龍香案之側數十年天下之異人方士皆得博叅而徧識其於道所得超矣

晚歲山中所養愈熟至正三年臘未盡三日偶過廬陵
弭節玄妙觀朝天閣常喜夜與道士翦燭談道明年正
月三日甲子子時曙欲動先生未睡也獨與道士曾體
仁相攜遙虛廊遂坐雲堂上論修真養虛之法存神守
丹之妙語頗密明日遂書其事以遺體仁或疑先生所
書者實不書所云也予不及質之邵菴問體仁笑而不
言噫邵菴所謂他年相見於閬風玄圃者其亦使予騎
麟翳鳳而驂其間歟

表

賀聖誕

代吉安
路總管

伏以龍飛當御開壽域於九州虎拜稱觴衍皇圖於萬歲乾坤共慶人物咸春欽惟皇帝陛下功冠百王道先太極乃聖乃神乃文武運帝德為四海之君曰壽曰富曰康寧錫天下以九疇之福景運及光華之日月春風被錦繡之山河適當五百歲篤生之祥咸致千萬年無疆之祝臣等忝叨守土遠效呼嵩普天之下率土之濱

皆共樂漢主牧民之治如川之至如山之壽誰獨無華
封祝聖之心

啟

謁吳太守

伏以虎符分治聲名傳二千石之良駿諸回春氣象增
千萬家之盛江山若為之改觀民吏相望而革心春藹
閭閻歡騰鼓角竊惟後世之太守何異古者之諸侯為
國股肱厥有屏翰藩宣之責作民父母使無歎息愁恨

之聲是以昔朝每重茲選苟克當乎重寄必厯典於名

藩故郭細侯自雍郡漁陽而復牧於并州而黃次翁由

維揚潁川而入尹於京兆非惟使惠澤可遍於鄉國亦

欲使教歷以熟其才能大哉治天下之用心蓋亦非衆

人之所能識恭惟府尹中州間氣當代偉人牧民有漢

河南之良規

河南謂吳公

其治郡國常稱為異等律身有晉

廣州之家法

廣州謂吳隱之

雖酌貪泉而不易其心昔再牧閩

溪島洽兩歧之化雨繼遷守浙湖山歌五袴之春風撓

之弗濁澄之弗清服胥吏而超同列剛亦不吐柔亦不
茹抑豪右而惠小民以五事為侯伯之師以四書為政

治之本平反報母

此謂雋不疑

皆羨綵衣趨庭之可娛撫字

勞心

謂陽城

豈以畫戟森兵而為樂幸甚青原之千里聿

來皂蓋於九天使遐陬遠方始知有太守之重俾深山

長谷爭願識使君之賢有國家當用真儒此其效矣自

州郡入為丞相行且見之某歷落無成侵尋已老書林

騁朝藝苑翔夕謾如韓愈之自勤弟子攀桂先生卧雲

每為方平而取笑然思吾仁吾義之何歎將求老圃老農而為師豈意下車偶蒙問姓居是邦事大夫之賢者可不盡恭禮於盧拔處士之尤焉則非敢望

狀

保王梅邊

伏以徵求遺逸幸逢千載之明時薦舉賢良少見一鄉之公論庶從學校轉達省堂切見前太學生王某身備美才世推名士其事親也有溫席扇枕之風其盧墓也

有寢古枕塊之實文詞高古足領袖於儒生武事優通
屢削平於寇難論治體則不愧於賈誼懷義氣則素慕
於仲連雖丘園高蹈之多年而名譽自聞於四境不以
應詔是為蔽賢為此保結請申上司以備擢用允為相
應

文

贈武昌推官鼎以道文

乘相如駟馬已增鄉里之寵光大于公門間又啟子孫

之昌運聲名在黃鶴泰山之外氣象重仁山智水之間
恭惟某四海清標百年間氣其英發人皆以為賈誼終
軍其廉潔世或比之范滂楊震其操可以壓湖雲湘雨
之勝其風可以掃蠻烟瘴海之昏天子聞其名謂當在
朝廷羽儀之選宰相老其器姑試之州郡繁劇之間居

然以白簡肅萬里之海隅幸甚以花誥慶雙親於地下

天歷中中書奏江華尹鼎以道為武昌推官上驚曰此
不要錢聶以道今纔為推官宰相阿榮謂武昌非以道

不可

題疏

楊忠襄公廟

伏以忠臣義士化為長弘之血而不歸孝子慈孫可使
臯陶之祀而弗永蓋先忠襄死宋難幾三百載而名節
在人心有千萬年霜雪丘墟淒其金陵成敗之一慨春
秋俎豆誰非桐鄉愛慕之不忘而況後人可無祠屋今
欲一族共假魯許之田庶幾吾鄉自有巡遠之廟非真
望其福我壽我亦何可不尸之祝之老栢闕宮嗟歸來

兮趙氏之鬼北風西日會有感於荆公之詩

城西延福路修甃

伏以七里郭三里城共嗟西路之差永九達達一達道
安得后土之常乾奈何泥滑滑而雨蕭蕭況且路漫漫
而禽磔磔甃以瓴石宜矣庶幾車徒便之使前餽金今
餽金多助出衆力即朝運甓暮運甓坦途在人心白馬
鐵驪汨沒同無復絳老在途之辱青鞋布襪從此始便
歌周道如砥之詩程起修程福同延福

城東鷺洲石橋

伏以地闢天開以大江而壯上郡北來南去常一葦而
駕驚濤使待渡者如蟻立於沙汀病涉者希鵠填於河
漢今欲成長橋於鞭石若將以平路而視川水分白鷺
山落青天地勢既自初而有待海跨金鯢波開玉棟路
人可徹夜而行歌非惟王政之杠梁所當為亦且城闉
之襟袍有其蔽倘用工百萬餘夫能若雁蕩即灑水四
十七道不遜泉州明日過之鄉里拜何公之馬其福遠

矣子孫乘相如之車

府城西津浮橋

伏以臨流不渡共觀拍岸之驚濤造舟為橋便擬成梁
於平陸蓋空濶之極不可徒杠而涉十一月往還者衆
何用野航之受兩三人欲追前代之遺規大作東薪之
浮舫使履之者無鵠橋之填漢使望之者如覘道之行
空當路必有超鄭卿濟乘之功諸賢必有效坡仙捐帶
之助人人利涉步步安行父老來看定記巨鱉羣鯨之

舊子孫共過誰非高車駟馬之人

高坑竹園石橋

伏以幽谷空山地似睢園之有竹斷橋流水人嗟鄭國之無梁何可使盈盈一帶之間若真有洋洋千里之隔今欲效海仙之鞭石便可如靈鵲之填河是在羣賢共成美事卧波龍見不待揜羽翮而過之題柱馬歸將必有子孫之興者

刊忠孝史

伏以事君莫大於忠龍逢比干以義聞三代奉親莫先
於孝大舜曾子以行師百年故自亘古以來惟此二者
為首今有老於文學之令尹乃欲集其事類於當時已
蒙徵入於經筵宜即用工於繡梓諸君能捐已費一日
共覩人文甚盛甚休可傳可遠聖朝用乎是道所以教
四海九州舉世家有其書何啻歷千秋萬歲

玄妙觀法堂

伏以玄為衆妙門瓊館琳宮之幾百載法本真常道羽

衣黃冠之千萬年以晨鐘暮鼓來講於是堂可上雨旁
風不蔽於其坐必使盤盤焉可以隱相儒迎仙客必使
朗朗者可以調素琴閱金經是故撤而新之厥有起而
相者杏木梁桂樹棟坐看天近之琅題柳邊院花裏朝
共聽晝歸之珂珮人間五福聖壽萬年

桂隱文集卷四

欽定四庫全書

桂隱文集附錄

行狀

夏以忠

先生諱詵字桂翁號桂隱姓劉氏系出長沙定王子孫散居江西臨江之翟斜宋集賢學士敵公是中書舍人放公非兄弟叔姪以文學號江右三劉為先生之派族先生先世有諱滔字禹績官大理評事由翟斜徙吉水之南嶺傳六世至彥升彥明昆弟彥升字鵬舉五子競

爽第四子問字端臣生子少齊字思賢以書經領宋紹
興癸酉鄉薦是為先生之高祖少齊子黻字德卿宋太
學生與陳東上書留李綱被斥歸從誠齋楊文節公游
子銓為國學內舍以文學氣節受知文山丞相號麓隱
子仁榮字雲祥號習靜與弟化龍及長子元同領宋景
定甲子鄉薦世稱三劉復興明年兄弟俱及進士第雲
祥擢授從政郎平陽縣尉先生平陽第四子也母李氏
有淑德懿行先生始生平陽公夢晉左丞郝廣基桂林

一枝之語故名二歲失王父母五歲能識竒字授以古
人詩文輒成誦與羣兒戲設俎豆揖讓進退有不式者
即去之七歲而孤九歲而宋亡崎嶇兵革中太夫人授
以經史寢食不廢先生以穎悟之資奮志不凡尊師取
友刻意問學自能樹立於羈孤不墮先業又克大之年
十二能賦論十五為童子師有持異書詰所難知者先
生得書一夕盡其義明日以語或人愧謝去舅氏鶴田
肯堂深齋皆名進士咸器重之先輩趙文彭元翼晏宗

鎬梁節艾幼玉皆知名士優游鄉校雅相敬畏雖科舉已廢猶以其文教學者先生學益力名益起劉氏自翟斜而下益有光焉大學博士劉公辰翁見先生詩文極稱之禮部郎中鄧公光薦奇其詩賦為之序引尋命其子受學復列薦名士五人於提舉方崖蕭公泰登先生辭不試後提舉蕭公禹道聘處鄉校始居郡城弟子彌衆曾制幹先之楊縣尉如圭皆忘年交後方崖蕭公為御史薦以校官鄭公鵬南為尚書薦以遺逆學山文公

為集賢薦以館職狀上於朝皆不報延祐甲寅科舉制
行先生年幾五十有司舉孝弟明經太守強勸之駕先
生曰科舉之學吾非不能但學以講道豈以是為富貴
之荃蹄邪辭不就乃隱郭門訓學者以師道自立士子
千里裹糧而至一時名家巨室欲其子弟規進取者咸
師事之若進士顏成子羅見大如篪輩皆門弟子也先
生於其質之不逮者必誘掖獎進其俊秀者必力許與
故多所成名廬陵胡楨弱冠受學先生憐其貧而篤教

之及歿先生復哀之而表其墓同門蕭升周賀為刻石
焉先生理家豐不踰矩儉必中禮耳目之好一不經心
不為世俗好尚之所淪染母賢子孝聞於遠邇至於冠
婚喪祭於禮不違事諸父謹嚴與諸昆季盡恭敬友愛
之道先世恒產悉推讓之子姪及門遇以禮而教誨之
必以忠信節儉為本伯氏早世其子古臣方幼撫育訓
導使有成立古臣死又撫其子如古臣夏氏女死子女
俱角羈皆教育而婚嫁之晚即南嶺叔祖祠率子姪歲

時祭祀正昭穆之序貧族不自給及婚葬不備者皆賑
貸之而不責其償焉居常義冠博帶行規步矩有古君子風從容廬里數十年凡夫稚子皆知起敬公卿大夫士聞其高風莫不聳動而願見之先生未嘗出其所長以自鬻與人交接一主於敬久而不衰心怡氣和不妄語笑苟義有不可即毅色正言人莫敢犯嘗言於官府復司戶廳詩人堂於鄉校曰此唐叅軍祠可泯泯於僧寺乎吾非以為名也歸婦氏墳廬奪於豪卒者曰彼弱

不自立吾非以為利也釋誣指逋負后妃王邸錢者數十日長此安窮無厭將及我非以為德也晚年進學益勵於初四方求文襁屬於門先生手答如流若不用意而理致森嚴莫不歎服有詩文若干卷板行於世曰桂隱集翰林承旨歐陽公玄未識先生而書問頻致稱先生道德之重藻鑑之明其為文根柢六經屬饜子史躡蹠百家渟滀演迤資深取宏契獲哲匠達於宗工不鉢剗心目不捐擢胃腎液古融今自執其韁靡慮不獲靡

施不宜雖未嘗露其雋傑廉悍踔厲發之狀韞玉在
櫝氣如白虹不可掩抑及叙先生文集有曰余讀先生
之文溫柔敦厚歐也明辨雄雋蘇也至論其妙抑豈相
師也哉有不可傳以言者矣翰林侍制柳公貫稱先生
德業之盛於古人不多讓蓋先覺之士也奎章侍書學
士虞公翰林侍講學士揭公尤相知重至郡從論文累
日不忍去既別往復有書虞公稱先生以英偉之器不
肯小出以徇世好卓然如靈光之在魯風雲變遷三光

不為之蔽虧潢汙載道大陸不為之昏墊霜降水涸而
松柏後雕沙礫汰除而黃金獨耀區區早持不足之資
以應世退而亦已衰老求如公以伏生之年教授齊魯
不輟何可望其萬一所賜之書驟而讀之如雷雨既盈
千源並合大江安流不見涯涘萬斛之舟寶藏充溢旌
旄導前笳鼓擁後賓客竝列雅歌投壺浪波魚龍獻態
呈狀形勝古迹過目如電快哉快哉又曰先生之文無
奇崛艱險之僻固波瀾之浩蕩無頽靡膚淺之陋固山

嶽之雄峙愚嘗以為生一鄉而不溺於一鄉之薰習生
一時而不合乎一時之流俗豈非所謂偉然間氣而何
待於人哉及觀先生詩文而序之曰集嘗承乏禁林竊
意高蹈遠隱之士必有過夫人者而不之見也歸僑江
上乃得劉桂隱先生之文於其門人學者而讀之則誠
昔日之所願見而不可得者也惜乎江湖之遠而不能
有所薦於上焉又以先生之文為能繼夫歐陽永叔曾
子固而稱之曰山林之日長得以極其力之所至學問

之志專有以達其知之所及知其背於塗轍之正即有所不為知其可以傳諸方來則言之而無疑論古今成敗而無所蹈襲出人意表觀乎瀧江之麓青原之波不亦善於達本而溯源者乎揭公乃曰大江之西德足以潤身文足以垂後有子孫之賢無飢寒之迫如先生者真天下之至樂至榮者也又曰方今天下德行文學之士日寥寥矣若江西惟先生耳又曰先生德行日尊文章日富豈僕娓娓者比邪又曰論古今文章辭甚高義

甚富病甚切而憂甚深古人所以為古人今人所以為
今人往者不可追來者殊可歎如先生者幾何人哉近
數見製作令人不能釋手益增向仰之懷取蹟於大人
君子日夜思念果何益邪及為先生詩文之序則曰先
生非君子之行不行非聖人之學不學其養之也深其
積之也隆其地不離於間井其名不登於廟廊其發之
也沛然浩然而常有餘故其詩沈著幽遠得天地之性
情其文平實敷暢會古今之法度因其所感而為之律

乘其所託而為之義或常或變而不可窮惜老而不見
用於朝廷也先生以宋咸淳戊辰八月二十六日生卒
於至正十年九月十三日享年八十有三葬以是年十
二月二十五日墓在州之仁壽鄉東槎灘之原娶印岡
羅氏有婦德能致內助前先生二十年卒子男三人長
立敬前先生五年卒仲尚文克世文學先生鍾愛之早
世季應麟業進士女四適同郡李以遜夏昶彭鑑蕭泰
端皆宦族昶以下三婿今皆有官孫男七觀先天次程

瑜諒璉讓珣琨今為龍溪書院山長瑜新城教諭嗟乎
劉氏世澤之盛代不乏賢自平陽聯科而後陵谷變遷
不獲究用於季代然先生克紹先業迪光前人斯亦難
矣今之士大夫稱先生德行道藝如出一喙尚論其人
孰有賢於柳待制歐陽承旨虞揭二學士者哉四君子
德業聞望已極一時之盛不輕與可而能極其稱許敬
慕則先生之實學從可知矣先生卒門人進士顏成子
已狀其行山長病其未詳以語以忠以忠自髮始燥斂

祐盛名世父果原先生於先生之居壤地相接為輩行
交誼彌篤而以忠又與山長友善故於先生之潛德懿
行尤所悉焉敢摭其梗槩以千名世之士銘其藏而表
章之使先覺之士死而不忘非斯文之幸與至正二十
四年春正月甲戌狀

墓碑銘 歐陽玄

廬陵劉桂隱先生卒葬之三年子應麟遣孫程來京師
請其墓銘於玄值世多故未暇請也又三年遵東海以

歸乃致前請謹摭其行狀叙而銘之先生諱詵字桂翁號桂隱其先清江之瞿斜族也瞿斜之族自宋公是公非弟兄叔姪以文學聞天下號江右三劉先生之先世有諱滔字禹績者由瞿斜徙吉水之南嶺傳六世至彥升彥明兩弟昆升字鵬舉五子競爽第四子曰僊字端臣生子名少齊字思賢是為先生之高祖考少子生子黻字德卿宋太學內舍從誠齋楊文節公游子銓字衡父受知文丞相號麓隱子仁榮字雲祥號習靜與弟化

龍長子元方同領景定甲子鄉薦明年俱及進士第受平陽縣尉先生平陽第四子也生二歲失王父母七歲失父九歲宋亡奮以穎悟之資自樹羈孤之中能不墮先業又克大之今之大夫士論先生德行道藝必推本其先人於是平陽之畔科雖不獲究用於季代因先生克紹咸稱其有子而劉氏自翟斜而下益有光焉先生之為德不為世俗之所搖惑不為風聲氣習之所淪染卓然以重厚醇雅與鄒魯士埒而無怍容事諸父及諸

昆弟盡恭敬友愛之道先世恒產悉推讓之子姪及門
必厚遇以禮伯氏早世其子古臣方幼撫育教誨使有
成立古臣卒又撫其子如古臣夏氏女沒所生角羈未
配教育而婚嫁之如禮晚即南嶺剏始祖祠率族人歲
時祭祀以正昭穆之叙居家處鄉有古君子風訓學者
能以師道自立至其為文根柢六經屬饜予史蹣跚百
家渟滀演迤資深取弘槩獲哲匠達於宗工液古融今
自執其韁靡慮不獲靡施弗宜雖未嘗露其雋傑廉悍

踔厲風發之狀韞玉在犢氣如白虹不可掩抑四方求文襁屬於門有古文若干卷諸體詩若干卷駢儼書劄若干卷總題曰桂隱集蜀郡虞先生豫章揭先生及玄皆嘗叙之各以所見極其形容詠歎之盛然以先生之文微吾三人言有不行世者乎先生歿吉之弟子顏成子狀其行稱先生年十二三時長於宋季程文若律賦論策臨文沛然蔚有老氣宋之遺老鉅公若李氏鶴田肯堂深齋三公於先生為母黨尊行一見即以斯文之

任屬之中齋鄧公須溪劉公於先生為鄉先正見其文
尤加器異鄧公嘗延之家使範其子若彭巽吾晏山心
於先生為畏友往往推服延祐初科舉復興先生年纔
四十餘州里有司舉孝弟明經太守強勸之駕先生好
古與主司瑟竽理之必然不足深論先生退自場屋一
時名家欲其子弟規進取者必厚幣求師事之古有善
射者射牛鏃掠牛腹舍麤詣精以不中為勝賢父兄願
欲得其不中之奇他日與拘拘然求中者角我欲中斯

中耳方崖蕭公為御史以教官薦學山文公為集賢以
館職薦尚書鵬南鄭公過廬陵見之歸朝以遺逸薦公
卿推轂當時賢士推轂者可得美譽賢士何與焉先生
生宋咸淳戊辰八月二十六日卒以大元至正十年九
月十三日年八十又三葬以是年十二月二十五日墓
在吉州之仁壽鄉東槎灘娶印岡羅氏有婦德能致內
助先二十年卒子男三長立敬先五年卒仲尚文克世
文學先生鍾愛之惜早世季應麟業進士女四人適同

郡李以遜夏昶彭鑑蕭泰端皆宦族昶以下三壻皆有
官孫男七觀先夭次珵瑜諒璉讓珣珵今除龍溪書院
山長瑜新城教諭孫女八曾孫男二未名玄於先生未
獲一識而書問不絕相知為深虞公晚歸田過從甚樂
每有相見遲暮之歎虞揭二公皆先卒玄以垂老之齒
獨得銘公銘曰

宇宙氣化消長有時斯文盛衰不係乎茲富貴儻來非
悠久功名時至亦易就維茲二事衆可勗天畀斯文曰

予獨近代四家廬陵眉山臨川南豐頡頏其間展也桂
隱實宗歐陽豐曾約蘇謹嚴歸王天慤其衷不斬所重
我其承之責若光寵在衆不隨予獨不訾不貶厥齋俾
昌於詒



桂隱文集附錄